

# Galesia thofroh gontwat

## Porr dwandfakhato htafmot

### Barkof kfo nuhas mrokfom

Judam tom tu barkof kmim Jisasr rihik gungonakmom. Kto yima tangim. Aposer Porrn gutnius mrokfot hany habrihato kfo ptha nuhas htasmotr yima tangim wanyhato Jisasr rihikakmomr. To nd yima tangim rom tohnamo yiham nhai Mosesrhu boririfhut hikmoam. Ndnetmn bok dukefm kakmoum. Duka memoum, “Nom Jisasr hikwohate ka Mosesrhu boririfhut ka hikrahnomt o nhai?” Nd bok dukefm kakmoum. Judam sinyahato kfo memom, “Yimam kangm Jisasr ahiknom, nd yimam Judaroh nkifra tha pukwa yuhat hikkfot. Yo Mosesrhu wom boririfhum hikkfot.” Porr ndhtet mrokfom wanyamohat kfo memor, “Arihat Bro Nkifrar nhai tha puketm htihato hti yindhorkahrm, nhai. Arihat Jisasr hiket yimarpam hti yindhorwor. Hti yindhorhato tohwom.”

Galesia thofmpno ndar gontwat wandfafmohat, Porr wanyakmor wom Judam Galesiako yihato Galesiakorhof Kristenm kfo tkrurmomm Mosesrhu boririfhuthu hikneft. Porr nd mrokfot wanyakhato ndar gontwat Galesiampno htafmort. Porr duka memor, “Nd Judam yihato nkifra boririfhu hikneftn frhammorahmm.” Ndnetrn ndar gontwat wandfakhato htafmort.

Porr ndar gontwat htamo barkof mrokfot kfo memor, “Bro Nkifrar nda Aposer hingerneft htamora. Nhai be tukanhu fijon o wom yimar htarmora. Nhai. Bro Nkifrar yima tangim dukahato memor, ‘Rorn nd kmimpno yihato gutnius ptha nuhasrahm.’” Ndt kfonihato tfit wom mrokfot kfo memor, “Yimam Kraiss Jisasr yakitohwam tom nd yimarpam rroh toh rawofm Bro Nkifrar hti wuthewurm.” Wuroh mrokfom kfo memor, “Nom bi yiro nyimsrn rir hmbreyetnom Jisasrn fak nyimbisakakmornom. Yak nyimbisakakmotrn nom yimanom korhnom. Yo Bro Nkifrarhu Yafothatn yak hta bohtiwattnom dborioh dborioh nefm newunomm.”

## Tu Bro Nkifarn Porr Aposer hingrneft fak htamorr.

(Sapta 1.1–2.14)

### Tu Bro Nkifarn Porr aposer hingrneft fak htamorr

**1** <sup>1</sup>Na aposer Pora, nann ndar gontwat wandfiwanko. Nd aposer hingrneft yakmohat nhai wom fitoh bro yimamn wakfakhato kfo tkrurrmoma gutniuskfothu kfo htfas habrineft. Nhai. Jisas Kraisir ee Jisas Kraiser kasinyamo Bro Nkifrar, nmoh Bro Yifemr, rofn nd hingrneft fak htamofa. <sup>2</sup>Nani nanpno hingrnawa Kristenm, nom rpatn kahukwonomko ndar gontwat niko Galesia profins yorhwa siosroh met yindariko.

<sup>3</sup>Bro Nkifrar, nmoh Yifemri yo Nungohtet Jisas Kraiser, rofpno kfo bruttna kanga, nikmoh rhu nmbuham, yima yuhum yak marnya bomarnya, yak hta bohta marnyakahtfko be rhu marnyarahko. Nhai wom tamoh dukefenmpno rhuruhatko. <sup>4</sup>Kraiser Bro Nkifrar, nmoh Yifemr, kfomo tng yuhatn hikhato suh nanyormor. Nhai be sfno noh furarmor. Memor, “Aloh-kahta, yimam nanhu noh nmbuhat htihato toh bmtaruhamn nd fasoh fasoh nefm mong trohhato dborioh nefrpam hikrahm.” <sup>5</sup>Ndnetn yiha yiha kfo yuta hagrha yindhorrahnomr.

### Rpa gutniuskforpat korht

<sup>6</sup>Nd niko niwa nefmpno na tfit mduka nhiyakahukanko. Bro Nkifrar niko hti yuhuwafhato Kraiser kfo tkrurafmotrr ror niehato fakmorko. To bi rorhu tirt ruhetko tfit yudbatn mong trohmokomrn tfit womhtet gutniuskfot hikmoko. Na wofnkaha niko ndhtet neft nanef. <sup>7</sup>Nd womhtet gutniuskfot niko hikwat niko mirahko ka tu Kraiserhu mrokfo mifet. Nhai. Be wom yimam niewamn kfo kekut bokekut nhehwomko. Niko rom kfoyuk mrokfom wanyhato mduka happuktewuko. <sup>8</sup>Bi niko barkof wany htayuk gutniuskfot tfit nomn o mounmotmn niahato tfit womhtet gutniuskfot kfo nuhaswomko, nd yimar inji nayukr, na kfiwa, “Bro Nkifraye, wayak hatohafokahtnr kaht aiswar.” <sup>9</sup>Bingot bi kfomonomko tfit ndar gontwatn tfit rpahtet mrokfot tfit wompam kfiwanko. Wom yimar niahato nhai niko barkof yakyuk gutniuskfot kanjo kfo pthakahrt, na kfiwa, “Bro Nkifraye, wayak hatoh-afokahtnr kaht aiswar.”

<sup>10</sup>Na nd kfiwa mrokfot to niko finji dukewakomt? Bro Nkifrar kanga awany yindhorra, ndnetann nd mrokfot kfiwanko? E, yimam kanga awany yindhorma, ndnetann nd mrokfot kfiwant? Nhai. Na kfiwanko, amekahann yimam inji dukahato awany yindhortwoma, na nhai Jisarhu hingrna yimaya tohrfota. Nhai.

### Porr aposer hingrneft yakmo yuhat

<sup>11</sup>Bar yinouroko, kfo mifwanko, nikompno na nia kfo nuhashemo gutniuskfot, nhai wom yima mifmn wakfo pthakrmomt. <sup>12</sup>Nhai wom

yimarn kfo nuhas bonuhasrmotra na wanyhato nia kfo nuhasrmoyanko. Nhai mif. Tu Jisas Kraistrn mrokfom yak nuhasmotra na mrokfom rorpno yakhato nia kfo nuhasmoyanko.

<sup>13</sup>Na bingot namao nefm wany-moukomm. Na bingot tohmohat Judaroh nkifra boririfhut fak hik marnyamoyant. Na nd boririfhut yakitohhato Jisasr hikwa met yindarim bi fak bati hany titamoyanm.

<sup>14</sup>Na toh hnamohat, na nhai Judaroh nkifra boririfhut riyak htafo wonrmoyant. Nhai. Judakorhof bok damiagm nanpno rpat warho hanyuknom nann boririfhut yak marnyahato nann tfit kfo hta bohtamoanm. Nanrpaya tunmoh nkifrar boririfhut fakitoh kihmoyant.

<sup>15</sup>Na yuhre mmemthu yatit ruhetann bi Bro Nkifrar hti yuhuwafhato kfo memor, “Nd yonrn aposer hingerneft yakitohrahrt.” Hti yuhuwafhato yakmora rorhu hingerneftn fak htamora. <sup>16-17</sup>Rorhu dukeft duka memor, “Tukanhu yonr ayak nuhasokhtanr ror htiruharn yima tangim kfo nuhas hi hanyrahm.” Nd dukeftpno fak nuhasmora. Na ror htinimohat nhai tfit marimoya, “Wom yimarpno yirhoyann rorn kfo hta bohtahato yak nuhasrahra hingernefthu hingerneft yuhat.” Nhai. Yo nhai marimoya, “Jerusalemko afo yiyaknirhoyann nd aposer hingerneft bi ritoh gngonakyuk yimampno afo yiruha.” Nhai. Na Bro Nkifrarhu yonrpno nahtimohat be kantri Arebiako be yiyakni twanhomoya. Be ndko afo tohafonihato ee tfit taun Damaskusko yimoya.

<sup>18</sup>Husfirpa gunyjimm yinyimotm Jerusalemko yifrar yihato Pitar mhti tanyomoya. Fiftin yiham tohno tanyomoyanr. <sup>19</sup>Pitarpno mtoh tany-mohat nhai wom aposerm htirmoya. Brorhu nmem Jemsrpar htimoya. <sup>20</sup>Na mirahko, ka kfo furewurnom. Na tu kfo mif mifwanko.

<sup>21</sup>Jerusalemko tohni hanyhato kto tfit Siria yo tukanhu distrik Silisiako, nd hus distriktf yi htfasmoya. <sup>22</sup>Judia distrikthu Kristen yimarpam nhai tafi htirmomt nanhu nyngatikt. <sup>23</sup>Be wany wanyomom kfo memom, “O nd yima Porr, nom yak bati hany sitamo yimar, rorn tfit arihatn tfit kfo kangrm, ‘Kraisrhu mrokfot wawany yakiokahkomtn wahikkomt.’ Arihat bi inji kfiwurm.” <sup>24</sup>Inji bi wanyomomn Bro Nkifrar kfo yindhormomr.

### Porri wom aposerm tfit rpa yima yuhur fakmom

**2** <sup>1</sup>Fotin gunyjimm tohniato ee kto tfit Jerusalemko Barnabasr-pno yimno. No yimohat Taitusr faknimno. <sup>2</sup>Tu Bro Nkifrar niahato kasinyamora Jerusalemko yinyeft. Na Jerusalemko yi tohmohat tuha Jerusalemthu sios hingerneft tohwa yimarpampno turpatnom ruhato kfo nuhas bonuhasmoyanm na yima tangimpno yihato gutniuskfot kfo nuhasmo yuhat. Memoya, “Rroh dukeft wany marnya duha be nanhu dukefrpatn hingerneftu nanhu hingerneft yi furaraht.” <sup>3-4</sup>Na sios hingerneft tohwa yimampno rhu rifinyhato nom naphamohat nmoh

mrokfem wany rikohyuk yimam yuwi yimomn mkfo nheh memomnom, “Nom Jisasr hiket yimayenom. Kangnom, rhuhatu niko pthayuk mrokfem wany yakitohrahnomko.” Yuwi inji mkfo nhehmemomnom. Rroh dukeft memom, “Rhuhatu wany yakitohrahnomm. Judaroh boririfhut finji kforuhamt? Yak yiritiyafrahmt o yakitohrahmt?” Na nd riny swirt mrokfo kfo pthamohat nhai marimoya nd nkifra boririfhuthu nmbuhath ptha srhrahnomt, nhai. Rifak htafmoyant. Gutnius mrokfothu mrokforpat rhu naphthamonom. Ndnatn nd yimam wanysihato kfo memom, “Wakfotwanm, ‘Judaroh nkifra tha puknefti boririfhut mirahn ayafho thunomt.’ Yafho thurahmt Bro Nkifrar nhai yindhorruhatm.” Rom yihato inji kfo pthamohat Jerusalemthu sios hingerneft tohwa yimam nhai rom pthamo mrokfot hikhatu kfo mari-moma, “Nd ninpno niayuk yima Taitusr nndo Grik thofer, tha wapuk-twanr.” Nhai inji kformoma. <sup>5</sup>To na nhai marimoya, “Nd yi pthayukroh mrokfom wany yakiohato Taitusrhu that puk thurahnomt.” Nhai. Nanhu yima yuhur nhai wofnkahr gutnius mrokfo yuhath kfo nuhashany tfit wuyakhato tfit wom yuhath pthakni inji nakfot. Gutnius mrokforpat pthewunomt ndrpat ptha nuhashato niko yimako nd gutniuskfot wanyukko wanyhato ndrpat hikrahko.

<sup>6</sup>Na nhai bro yufat mhtiyakkaha. Yo Bro Nkifrar nhai yima hatohyuk bro yufatn htikahr. To na nd Jerusalemthu sios hingerneft tohwa yimampno rhuhatu na hingernefti habrimo hingernefti hingernefti yuham kfo ptha nuhasmohat rom nhai wom mrokfom kfo ptharmom. <sup>7-8</sup>Kfo memoyanm, “Bro Nkifrar Pitar mrokfo rifhur hemotr aposer hingerneft Judampno hingernefti habrimort. Nd Pitar mrokfo ptha rifhur hemo kanjo, na inji mrokfo ptha rifhur hemotra aposer hingerneft yima tangimpno hingernefti habrimoyant.” Na inji kfomota nd bro yimam kfo memom, “Pitar Bro Nkifrar fak htamor Judampno tohhatu gutniuskfothu kfo ptha htasneft. Porrne yima tangimpno.” <sup>9</sup>Sios hingerneft, met yindarim htimoahat htimoum Jemsri, Pitare, Jonr, romn bromoumt sios hingerneft. Nd bro yimam nanhu hingernefti mrokfom wanyuhath memom, “Be tu Bro Nkifrar yuhuwafhatu nd aposer hingerneft fak htamor.” Be nd yiha rifakitohakmomno Barnabasrpo. Riyakitohakhato hingernefti yuham nafak nhtamonomm. Nonn yima tangimpno aposer hingernefti fakitoh-mono. Romn tu Judampno. <sup>10</sup>Hingernefti yuham nayak nhtanimohat rpa mrokforpat kfomomno. Memomno, “Nmoh siosn tohwom wom yimam maruha duhatm o wuskapa duhatm. Nd yimam mirahfn, ahti marsisanom. Nifnhu tirtn arhutwam.” Na bi ndhet yimam bi yakitoh hnetann tfit nd bro yimaroh tngt inji wanyuhath na be yindhormoya nd yimaroh yakitohneft.

### **Pitar namo neftpno Porr yima nyingahato kfomorr**

<sup>11</sup>Kto Pitar tfit yimor Antiokko. Ndko tohhatu wom neft namotr tu Pitarhu nyingahato kfo nyinga fnahmoyanr.

<sup>12</sup>Na Pitar kfo nyinga fnahmo nmbuhat nhai be sfno. Pitar Antiokt tohmohat yima tangimpno yimoarn nuwa yemaska inji namour. Wom yiha Jemsr kfo tkrurafyuk Juda Kristenm yimom nd Pitar tohmo kmi Antioktn. Pitar nd Juda Kristenm htiyakmohat nhai yima tangiroh kmifam tfit yihato yemskarmoar. Fakrmemor, memor, “Yima tangimpno rhu nafinyrhota hti nriyafrahma.” <sup>13</sup>Wom Judam nd tuha Antiok tohyukm, nd Pitar yimo yimbuyef duha yuharpatn hik bugamom. Barnabasr, ror nhaf nd yuharpat yimor. <sup>14</sup>Nhai gutniuskfot kfoyuk yuhatn hikrmom. Na nd rroh nefm htimoyann, Pitar yimaroh nyingahato kfo nyinga fnahmoyanr. Kfo memoyanr, “Ni Juda thofn arhun nhai tfit yima tangimpno yihato rhu nafif inji narfotn. Ni wom tangishofm kanjo tfit wom tangimpno yitann rompno rhu mska inji newun, to tamohmpno tfit kfo yamukanm, ‘Judaroh boririfhut wahikko?’ Ndt nhai tu dborioh neft nakahn.”

### **Met yindarim Krajs Jisasr yakitohhato hikwam, tom nd yimamn Bro Nkifrar kak wus bowuswor.**

*(Sapta 2.15–4.31)*

#### **Yimam Krajs Jisasr yakitohhato hiketm Bro Nkifrar kak wus bowusworm**

<sup>15</sup>Nom Juda nmoh trha yuhat, nom tu Juda frikef yuhtn trhamonom, nhai nd fasoh nefm nayet yima tangiroh frikef yuhatn trharmonom. Nhai. <sup>16</sup>To nom nhai duka mekahnom, Mosesr htanihemo boririfhutn yimam hikwamn Bro Nkifrar kak wus bowus-worm. Nhai. Nom nhai inji dukakah-nom. Nmoh dukeft duka kangnom, yimam tu Jisas Krajsr yakitohhato hikwam, tom nd yimamn Bro Nkifrar kak wus bowusworm. Ndnnetn nom to inji buga. Nom Krajs Jisasr yakitoh-watnom Bro Nkifrar kak wus bowus-wornom. Nhai nd boririfhuthu hikneftn. Bro Nkifrar bi kfo memor, “Yimar nhai boririfhu hikneftn yak wus bowusrhotanr. Nhai.” <sup>17</sup>To nom Judanom kangnom Jisas Krajsr hikruhanomn Bro nkifrar hifa hti wutharahrnom. Nd yuhat kangnom ainom, to tfit htinom nmoh ruheft yima tangim kanjo fasoh fasoh nefm furkihwom. Tom nom inji htineft ka tfit kfo mekfot Krajsrn nd fasoh nefm mhfnahnamorm? Ka inji kfokfot? Ka nhai. <sup>18-19</sup>Nanhu htiyef inji htitant, bingot Mosesr htanihemo nkifra boririfhut hikmoahat Bro Nkifrar nhai hifa hti wutharmorr nanhu yima yuhur. Nhai. To be ndnatn nd nkifra boririfhut yafho thunimoyantn Jisasr bi hikwa. Jisasrpnno bi tir niyakitohhato Bro Nkifrarpnno rpat tohwono. Tfit arihat na Jisas Krajsr hik hany hik hany tfit Jisas Krajsr myafhonihato nkifrar boririfhut hikaknineft na nhai tu dborioh yimaya rhurfota. Tu fasoh yimaya rhurfoya. <sup>20</sup>Na bi bgre

misn Krairpno rpatn tuhegirmoyann bi rpatn nohhato nfri yima yuhur fakmoya. Nd na yakitohwa nfri yima yuhur, tu Krairhu nfri yima yuhur korhra. Be nanhu duka yuhuwaf nmbuhatn nohmor. Ndnettn na tamoh tamoh nefm finji nanefn nda bbinysoft, Bro Nkifrarhu Yonr yakitoh kihhato hingrnewanm. <sup>21</sup>Bro Nkifrar yuhu-wafmora. Ndnatn nd rorhu yuhuwaf nmbuhat na nhai yakhato rituhaftakfot. Mosesrhu boririfhutn nmoh yima yuhum yak marnyahato Bro Nkifrar ahti wutharnom, to be Krairhu noh nmbuhat be noh furarmort.

### Nkifra boririfhuthu hiknefti Krairhu yakitohneft

**3** <sup>1</sup>Galesia thofko, be tu mmo hariyeko, Jisas Krair bgre mis nohmo yuhathu mna yuhath bi kfo nuhasmoyanko. To tfit frohmn kfo mmo bommomomko? <sup>2</sup>Rpa ttiwon nmbuharpata kanga attiwonanko. Niko Bro Nkifrarhu Yafothat yakmohate fitoh yuhathn yakmokomt? Judaroh nkifra boririfhut hikhatoh fakmokomt o Krairhu gutniuskfot wany yakiohato fakmokomt? <sup>3</sup>Ka bi yon mumenm kanjo nhai wom dukefm rhukahmko. Afo Bro Nkifrarhu Yafothat thu bmta hnamottko Bro Nkifrar hik marnya hnamokomr. Tfit arihat nd Bro Nkifrarhu Yafothat yafho thunihato kangko, “Tukmoh fijo ahiknomr Bro Nkifrar.” <sup>4</sup>Niko bi barkof yakmo krhopam ka be fak furamokomm? Na kanga, ka nhai yak furarmokomm. <sup>5</sup>Ka niko Bro Nkifrarhu Yafothat hihato nd mirakerm hingrna thofte ka Judaroh boririfhut hikwatko mirakerm hingrnewukomm? O ka gutniuskfot hikwatko mirakerkfot hingrnewuko?

<sup>6</sup>Abrahamrhu tndht dukakkfot. Abrahamr Bro Nkifrarhu mrokfom wany yakiohato yuhathn Bro Nkifrar fak wus bowusmorr. <sup>7</sup>Ndnettn niko ndt hti dukakkfot. Abrahamr Bro Nkifrar wany yakiohato kanjo yimam Krair wany yakiohato Bro Nkifrar kutewurm Abrahamrhu yon kunys. <sup>8</sup>Bro Nkifrarhu gonborngt kfo kangt, “Bingot Bro Nkifrar bi duka hta memor, ‘Kto yima tangim nanhu mrokfot wany yakio-ruhatmt yak wus bowusruhanm.’ ” Nd dukefetrn bi Abrahamr pno gutniuskfot bi kfo nuhas hta memor, “Nanhu mrokfom bi ninn wany yakionm. Ni bi wany yakiohato wahikkahtnm kto ninhu frikef yuhathn wom yimar nie-ruharn rorn wom hingrneft hingrna-ruhatrt na ndt htihato nda bbinysof-thu kmi kmim yak marnyaruhanm.” <sup>9</sup>To be Abrahamr Bro Nkifrarhu mrokfom yakitohhato Bro Nkifrar yak marnyamo kanjo, fitoh yimam Bro Nkifrarhu mrokfom inji fakitohmm, to be inji Bro Nkifrar yak marnyarahm Abrahamr kanjo. <sup>10</sup>Yimam Judaroh nkifra boririfhut hikhatoh kangm, “Bro Nkifrar nmoh yima yuhum ayak wus bowusrm,” nhai yak wus bowusruhatrm. Yak hatohaforuhatrm kaht riyahm. Bro Nkifrarhu gonborngt kfo kangt, “Yimam nhai nkifra boririfhuthu mrokfo bugam hik marnyahamm be Bro Nkifrar yak hatohaforuhatrm kaht riyahm.” <sup>11</sup>“Bro Nkifrarhu mrokfom wany yakiohato hikwa yimam yak wus

bowusruhatrm be rroh tohefm toh marnyarahm.” Nd mrokfom htitanomn duka kangnom, “Be tu nhai mif yimam nkifra boririfhut hikhato rroh yima yuhum Bro Nkifrar yak wus bowusneft. Nhai mif.” <sup>12</sup>Judaro nkifra boririfhuthu hiknefti Krairhu mrokfothu wany yakiohato hikneft nhai rpat niyaktkafkahf. Nndoh nndohef. Krairhu mrokfom wany yakiohato hikrahkomm hifa rhu marnya hatohrahko. To mirahko nkifra boririfhut hik hanyhato amyak yafidatni ayohninom.

<sup>13</sup>Boririfhut inji kfomot, “Yimam nhai nd boririfhut kfoyuk mrokfo toh hikkahr, nd yimar bi huker.” Nd tkittn Krair yawihnehato rorn nmoh nohyuk tkitt yakhato rorn nohmorn nom be nhai nohrhwatnom. To Bro Nkifrarhu gonborngt kfo memot, “Yimam misn tuhegirhato nohmoam kfo miyakmom, “Bro Nkifrar yak hatohafoyukem.” <sup>14</sup>Bingot Bro Nkifrar bi kfo hta memor, “Abrahamr yak marnyamo kanjo yima tangim inji yak marnyaruhanm. Yak marnyahato nanhu Yafothat rompno htaruhant.” Nd dukeftpno Krair nohmotr to be Bro Nkifrar ndt htihato nhai namburhato yak hatohafokahrnom. Kak marnya bomarnyewurnom. Nom Jisas Krairhu mrokfom wany yakiohato hikneft rorhu Yafothat thu hamuhwotnom.

### **Bro Nkifrarhu boririfhuti Bro Nkifra Abrahamrof nayak dbkafmo mrokfot**

<sup>15</sup>Yinouroko, Bro Nkifrar Abrahamr-pno mrokfom nayak dbkafmohat nhai Bro Nkifrar tfit mrhu kekuthato tfit kfo kekutrmor. Nhai. Wom yimar noh yibonneftpno tamoh tamohm bi yonroh yufamn fak htaniyahurm nhai womm tfit nndo yak nhtakahmm. <sup>16</sup>To be nd yuhatn Bro Nkifra Abrahamrof inji namof. Bro Nkifrar sinyahato Abrahamr kfo memorr, “Nini ninhu frikeft yak wus bowushato yak marnyaruhan.” To nd Bro Nkifrar kfo memo frikeft yak marnyaruhan, nhai frikeft bugathu yimam yak marnyarmor. Nhai. Krairpar fak marnyamor. <sup>17</sup>Na kfiwa mrokfothu mna yuhat inji korht. Bingot Bro Nkifrar Abrahamr bi kfo htamorr rorhu frikeftu yak marnyaneft. Bi nd mrokfot kfonimortn kto 430 gunyjimm yohnenimotm ee tfit mongkorn boririfhu mrokfom fakmomm. Nndnetn nhai tfit nd mongko niayuk boririfhu mrokfomn tfit myak tuhafokfot nd yimaroh yak marnyayuk mrokfot Bro Nkifrar bi kfo pthamot. Nhai. <sup>18</sup>Bro Nkifrar hifa yima yuhurpno Abrahamr kfo htamo mrokfom hikhato fak wus bowusmorr. Bro Nkifrar yimam yak wus bowus thoft nhai boririfhut hikwa nmbuhat htihato yak wus bowuskahrm. Nhai. Bi Abrahamr kfo htamo mrokfot yakitohhato kak wus bowusworm. <sup>19-20</sup>To tamohmpno Bro Nkifrar boririfhu mrokfom hemorm? Tamoh dukeftpno? Nd boririfhut hemohat bi Bro Nkifrar Abrahamrhu frikeftu yak marnya yuhat kfonimorrn ee kto boririfhut htamort. Rorhu dukeft duka memor, “Boririfhu mrokfom ahtakahtanm tamoh nefm yimam nanefst tfit boririfhu mrokfeft mhtiyakhato duka mirahm, ‘O art fasoh

nefet. Art dborioh nefet.’ ” Memor, “Nd boririfhutn yakitoh hanyruhamn ee nd Abrahamrpnno nnakfo nuhas htamo yima Kraistr nierahr. Nieruharn nd boririfhut rorn riyak htaforahrt.” Nd boririfhut Bro Nkifrar hemot mounmotm kfo nuhasmotr tfit romn Mosesr kfohemomr. Tfit rorn kfo nuhasmornom. Ror be buha tohhato Bro Nkifrarpnno mrokfom yakhato nom kfohemomr. Abrahamr nhai wommn Bro Nkifrarpnno mrokfom yakhato kfoharimomr. Ror tu Bro Nkifrar kfohemorr.

### **Bro Nkifrar hemo boririfhuthu mna yuhat**

<sup>21</sup>Bro Nkifrar hus yihotaf htamor. Abrahamrpnno wom mrokfot nafak tkafmoft. Yo tfit Mosesrpnno boririfhut htamor. Ka Bro Nkifrar Abrahamr kfo htamo mrokfom rihtafohato boririfhutn htamort? Nhai mif. Bro Nkifrar ame-kahrn, “Yimam boririfhut hikhato yakrhoyanmn nanpno yarim tohrahm,” inji akfor to nd boririfhutn yimam hikrfomn Bro Nkifrar yak wus bowusrform. Nhai inji kformor. <sup>22</sup>Turhu gonborngtn kfo memor, “Ndar bbinysofthu met yindari bugam ndar bbinysofthu fasoh nefmn yak kasitwatmm nhai dborioh yima yuhum yakkahm.” Ndnettn Kraistr yakitohet met yindarirpam Bro Nkifrar kak marnyewurm.

<sup>23</sup>Kraisrhu gutniuskfot tafi nia duha afo nkifra boririfuhe Bro Nkifrar fak hta bohtamornom. Duka memor, “Boririfhut yakitoh tefi hanykahmn ee kto Kraistrhu gutniuskfot hiruhanm.” <sup>24</sup>Boririfhutn yak hta bohta hnamot-nom ee Kraistr niamor. Bro Nkifrarhu dukeft duka memor, “Boririfhutn yak hta bohta tefi hanyruhattm Kraistrhu gutniuskfot wany yakioruhamn yak wus bowusruhanm.” <sup>25</sup>Arihat bi Kraistrhu gutniuskfothu hik yihayer bi. Nhai tfit boririfhuthu yak hta bohta yihar wom rhukahnom.

### **Kraisrhu mrokforoh wany yakiohato yak hik yuhat**

<sup>26</sup>Niko bi Kraistr Jisarrhu mrokfom hikhato rorpnno frtkafwatko to be bi Bro Nkifrarhu yon bugayeko korhko. <sup>27</sup>Niko bi baftaisnihato bi Kraistrpnno rim tohet yimako bi Kraistr hmbritkomr hmbrrsham hmbrita kanjo. <sup>28</sup>Nom bi Kraistrpnno tohyuknom Bro Nkifrar nhai yak nhtahato kfo mikahr, “Wurr Judayer wurr Griker, o wurr slefer o wurr nhai, o wurr yindariyer wurt metet.” Nhai inji kfo nhtakahrnom. Bi Kraistrpnno rim tohni bugewanomn bi kangme rpa yimayer. <sup>29</sup>Niko rpat yak tiphato Kraistrpnno rim tohneft to bi Abrahamrhu frikefthu yon bugayeko. Nd Bro Nkifrar Abrahamrpnno nnakfo nuhas hta memohat, “Ninhu frikeft kto hifa yak marnyahato hifa rhu nmbuhat hiruhanm,” to nhai womm yakruhatmt nd hifa rhu nmbuhat. Nikomn yakrah-komt nd rhu marnya nmbuhat.

### **Kraistr hingrnamo hingrneftn nom Bro Nkifrarhu yonnom korhnom**

**4** <sup>1-2</sup>Nanhu dukeft inji dukiwa. Wom yimar turhu yinemrhu yufatpno htayuk yewurit o tamoht nhai wommn yakkahmt. Tu yinem yonrn



kekwort. Yinem yonr tafi duka tungunakahr nd rorhu yufatpno htayuk yewurit o tamoh t afo yifem nmbrtomromn yakitohwatmt ror be wom yima furar tohwor afo. Bi bro damiagere ee tfit turhu tirtn korhm.

<sup>3</sup>Nom to inji namonom. Yon mumenm kanjo nkifra boririfhuthu yinhit tohhato fak hta bohtamoutnom. <sup>4</sup>Nd boririfhutn toh hanymonomn yonrhu nia yihar niamotr ee kfo tkrurafomotrr fawihnamor. Yima mif thet mettn hiyaumotr. Hiyaumotr to be Juda thofr tohmo. Juda thofr tohhato Judaroh nkifra boririfhutn hikmor. <sup>5</sup>Bro Nkifrar duka memor, “Nanhu yonr aikahrn kfo hta bohta mirahrm, ‘Boririfhut be tmift wayafho thukomt. Hikrahkomt be nhai hifa rhu nmbuhat o hifa tkitt yak htaruhatko.’ ” Nd dukeftpno kfo tkrurafmorr. Memor, “Nanhu yonr aikahrn boririfhu hiket yima buharn suh nanyorrah. Suh nanyorruhatr ndt htiruhamn nanpno yarim fnahnehato nanhu yonm rhurahm.”

<sup>6</sup>Arihat bi Bro Nkifrarhu yonko korhko. Ndnettn turhu yinemr mithu nawohmo Yafothat kfo tkrurafmotrt mithu nawohmotnom. Nd Yafothatn mithu nawohhato thu kasinyewatt-nom Bro Nkifrar kutewunomr dajar. <sup>7</sup>Ndnettn niko nhai bi wom slefko wom tohkahko. Bi Bro Nkifrarhu yoneko. Bro Nkifrar nikmoh yufatpno htayuk tamoh tamohm nikomn yihato yakrahkomm.

#### **Porr Galesia thofm dukahato yima yuhur nhai marnyarmorr**

<sup>8</sup>Niko tafi Bro Nkifrapno nahti duka duha toh hnamo yiham tukmoh nkifra tahi yifonm hik hnamouko. Nd niko hik hnamoa tahi yifonm nhai ndar nom hikwa Bro Nkifrar kanjo rhurmom. <sup>9</sup>Tfit bi arihatn Bro Nkifrapno nahti duka nahti dukewuko. To tfit tamohmpno ginyetm kanjo mongthur mongthur yitakomn yamu-kako tfit, “Nd yatn nkifra boririfhut ahiknom?” Nd yafotha yimbuyef duha boririfhut hikruhakomn to ka mirahko hifa rhu marnya nmbuhat hirahtnom. Nhai. Nd boririfhut hikrahko be tfit fnykt mim ki tawon hmbrita kanjo ki hmbriyaforahtko. <sup>10</sup>Niko inji newuko. Fitoh yiharn o yamtn o gunyjimtn tamoh neft bi kfiko ruhato yemro burwat o tamoh neft finji nanef, nd niko kfoyuk yihar nhai rhu mmoni-kahko. Nhai. Nd niko kfoyuk yiham korhwokomm. <sup>11</sup>Nd nefm tfit hikwatko nanhu yima yuhur nhai marnyakahr. Ka nd gutniuskfot na nikompno yi pthamot ka nhai yakitoh-kahkomt?

<sup>12</sup>Bar yinouroko, inji newatko yima yuhur nhai marnyakahr. Ndnetann kanga, akfo nnuhanko. Nanhu toheft hikkfot. Na nhai wom Judaroh neft yakitohrmoyant nikompno yi tohmohat. Niko na htimohat nikmoh tirmn rhumoya. <sup>13</sup>Niko ka duka hanitko na wom yiha dbohnetan nikompno yitoh-hato barkof yiha gutniuskfot kfo nuhasmohat. <sup>14</sup>Nd yiha niko na dbohneft yakmohat nhai hti marsi-sarmokma. Nhai. Mounmotm o Kraiser kanjo inji yakmokma nikmoh tirmn rhumoya. <sup>15</sup>Na nd bro dbohneft yakhato nyingam bebtamohat na tukanhu nyingaye hti mifmoyanko.

Nyingam be yak rurhaketm arhum, ka nikhomn yak rurhakhato nanhu nyinga bebr yak rurha thuhato nikhomn htarmokma. <sup>16</sup>Nd yiha hifa yima yuhur hmbremokma. Tfit arihatn faso yima yuhu bebr hmbritkma. Bro Nkifrarhu tu mrokfom kfo nuhas hanitwotanko gobenm kanjo htitwokma.

<sup>17</sup>Wawanyko. Nd niko mkfo yuhur boyuhuryuk yimam, nhai hifa rhu nmbuhat hiruhatkmo. Yuwi kangm, “Inji amkfo yuhuraknikahnomm ayak tndohnomm. Yak tndohhato nompno yarim tohrahm.” <sup>18</sup>To nanhu yima yuhur nhai fitoko rhukahr. Nikomn be korhr. Nikompno brbo tohneft o wuri skitm tohneft na nhai duka mmonikahanko. <sup>19</sup>Niko nanhu tu dborioh yimateko. Niko ridukak thoft nanhu yima yuhur kurhiwur. Be nd kurho yima yuhur rhu hanyruharn bi tfit Krairhu mrokforpamn tfit hikwokome be yima yuhur marnyanirahra. <sup>20</sup>Na wuri tohwoyann nikmoh mrokfot wanyhato yima yuhur nhai marnya-kahra. Be rpa tkitt rpat atohnom, awi, hifa hifa tfit kfo marnya bomarnyar-fotanko dborioh yima yuhum tfit niarfomko.

#### Hagar Sararofhu kfo nhombra mrokfot

<sup>21</sup>Nikhom womm duka kangm, “Nkifra boririfhut ahiknom.” Afo Mosesr wandfamo mrokforoh mna yuham afo myak hik marnyakkfot. <sup>22</sup>Mosesr wandfamo mrokfot kfo memot, “Abrahamr hus metf yakhato hus yon yindarif kasinyamor. Tu yak tuhan mif Sarat hiyaumotr Aisakr. Rorhu hingrnefroh hingrnayuk fndoh tuhan Hagartn Ismerr.” <sup>23</sup>Wom yak tuhanthur Bro Nkifrarhu tngtpno nasakmorr. Wom fndohthur nhai be Bro Nkifrar kformotr nasakrmorr. Nhai. Ror be nasak furakmorr. <sup>24-25</sup>Bingot Bro Nkifrari Abrahamr wom mrokfom nafak dbkafmofm. Tfit kminysof Sainaitn Judampno nafak dbkafmomm boririfhu mrokfom. Sara Hagarrofn rhu nhombramoff nd Bro Nkifrar yak dbkafmo hus mrokfeff. Sainait korhwot Arebiako. Nd Sainait Arebiam kute-wumt “Hagart”. Yimam nd boririfhu mrokfom hikmoahat tohukatohroh tngm yak hikwa kanjo be inji hikmoumm. To mirahko ka bingotrupa nd boririfhut hikmoum. Nhai. Arihat taun Jerusalemthu yimam nd boririfhut yuhre kakitoh hanitmt. Ndnnetn Hagarthu yon Ismerr kanjo yuhre boririfhuthu hingrna yimam korhm. <sup>26</sup>Nom tu Bro Nkifrarhu taun Jerusa-lem mift tohyuknom, nom nhai nd boririfhu mrokfom tohukatohroh tngm yak hikwa kanjo hikkahnom. Abrahamrhu yak tuhan Sarathu yon Aisakr kanjo korhnom. <sup>27</sup>Bro Nkifrarhu rfa borngtn profet Aisaiar wom mrokfot kfo memor,

“Ni, yon hiyau duha mete, yindhorrahn!

Yon yak rphawon duhatn yonmari yiham toh hnamo mete,  
kfo yindhor boyindhorrahn!

Yindari frtroh tanyet metn, to nhai,

tfit yindariyet metm kanjo yonmari yon rifhur hiyau-rah.  
Yindariyet metm nhai ni hiyauruha yon rifhur kanjo hiyaukahn.”

*Aisaia 54.1*

<sup>28</sup>Bar yinouroko, nikomn Aisakr kanjo Bro Nkifrar kfohato dborhayuk yoneko. <sup>29</sup>To tfit nd Bro Nkifrar kfo duha nasak furakyuk yonrn sinyahato Bro Nkifrar kfohato nasakyuk yonr faso fak bebmorr. Arihat to be nd rpahtet neft korht. Nkifra boririfhut hikwa yimam sinyewamn Kraistrhu mrokfom hikwa yimam faso kak bebwomm. <sup>30</sup>Bro Nkifrarhu rfa borngtn kfo kangt, “Wayak tuhafonf hingrna metti rothu yonr. Fndoh tuhanthu yonr nhai tfit niahato yifemrhu wuskam yakitohkfot. Nhai. Tu bro tuhanthu yonr yakneft nhai mrokfom.” <sup>31</sup>Bar yinouroko, nom nd tndht htihatoh nmoh yima yuhum duka mekfot, “Nom nhai nd fndohthu yonnom rhukahnom. Nhai. Nom tu bro tuhan mift hiyauyuk yonenom.” Ndnnetn nomrpanomn hifa rhu nmbuhat Bro Nkifrar hirahrnom.

**Kraisrn nmoh toh rawofm yak wus bowuswatrn om ee Bro Nkifrarhu Yafothat yak hta bohtewattnom womm dborioh nefm newunomm.**

*(Sapta 5–6)*

**Judaroh nkifra boririfhut hik duha**

**5** <sup>1</sup>Be nd nkifra boririfhutn tfit rim hikak mhikak yifahta hatoh duha. Kraistr bi nfri yihotar fak hta nuhasmornom. Tfit wom yimam niahato mtawas tiwonwomko tha pukneft wany marsisafohato toh bmtakfot. Riwany yakiowakrahkomm to be nd boririfhutn yak hta bohta hasorahtko.

<sup>2</sup>Wawany marnyafu hanyawako na Pora kforuha mrokfom. Tfit mirahko Judam kanjo boririfhut hikhato tha apuk thunom. Inji narahko to be Bro Nkifrar nhai Kraistr nohmo yuhat mhtiyakhato yak marnyaruhatrko.

<sup>3</sup>Tfit wom mrokfot kfiwanko. Fitoh yimam kangm, “Nd nkifra boririfhut hikhato tha apuk thunom,” nd yimam to be mirahm wom kfo boririfhu mrokfem arim tohnm. Nhai. Nd kfo boririfhu mrokfom rim hikak mhikak bugakkfot.

<sup>4</sup>Niko kangko, “Ka boririfhut hikruhanomn Bro Nkifrar yak wus bowusrahnom.” Nhai. Niko be tukomn boririfhut hikwakomn tfit Kraistr yekwakomr nndo riyak htefiwukomr. Inji newuko Bro Nkifrar nhai hti yuhuwafhato yak marnyaruhatrko.

<sup>5</sup>To nom nhai. Nom be Kraistr wany yakiohato rorhu mrokfom bi hikwanomn nmoh yima yuhum be rhu duka haso kangm, “Nmoh yima yuhum Bro Nkifrar yak wus bowusrahm.” Bro Nkifrarhu Yafothatn nd dukefr kahukwotnom.

<sup>6</sup>Bro Nkifrar yimam yukatoh thoft nhai tha puket yimam o tha puk duhat yimamn htikahr. Nhai. Yimam Kraistrpno rim tohhato womm hti dukewam, tom ndhtet yimam Bro Nkifrar kukatohworm.

<sup>7</sup>Barkofpam afo hifa Kraistrhu mrokfot fak hik marnya hnamokomt. Yak hik hnamokomtn to tfit tamohrn buha tanhehafomotrko manysifm kanjo yihom kke rmonmoko? <sup>8</sup>Nhai nd niko nakuyakmo Bro Nkifrar tanhehaformorko. <sup>9</sup>Nikmoh yima yuhum tom bi nndo yiyaknitm. Inji tefinitamn kto be nndo yirahm. Htitwokomt Bretparoh hingerneft. Tefi yispenn yakhato plauapamn rihtafo-rahnm kto htirahnt nd Bretpat tfit broraht. <sup>10</sup>Nanhu dukeft duka kanga, “Bror fitha yiruhatr rroh yima yuhum nndo yiruham?” Na duka kanga, “Nd rom yorh hasiwa yima yuhum be Kraistrn yak marnya bomarnya-ruhatrm tfit nanhu yima yuhurn mikmbrehato hikrahm.” Nd niko harhuwa yima yuhurparne kangane, “Tamohrn frmmo bomumiwatrko mduka happuktewako?” Nhai mrokfom. Nd niko frmumiwa yimar Bro Nkifrar afo htiwonrahrr.

<sup>11</sup>Bar yinouroko, nanhu mrokfom kfo pthamom, be akfo mekahann, “Tha pukneft nhai mrokfom,” yimam nhai namburrfotma. To nhai, kfo memoyanm, “Tha pukneft bi bgre misn Kraistr mfha htahato fak nohmort. Nd neft wayafho thukomt.” Nd mrokfot kfomota namburwoma. <sup>12</sup>Nd yimam niko kfo mmo bomumiwam, tha pukneft kangm, “Ayakitoh hanynomt.” Nhai mrokfefm. Tumnd neft yakitoh-hato be yuht nyisofetm puk tmbha thu hanykfot.

<sup>13</sup>Niko, nanhu yimatko, afo nkifra boririfhu mrokfomn afo ufak afak-moumko. Tfit arihat bi Kraistrn nd niko yak nhirtamoa mtitofit puk thumortn rorn yakaknihato rorhu mkuko rim fak htamorko. To mirahko akfo amanyom, “Nkifra boririfhut bi be. Bi nhai wom yakitohkahtnom tfit tunom hatohnayuk fasoh yima yuhu bebmnd ahiknom.” Mirahko ndhtet yima yuhum ayaknom. Niko Bro Nkifrar hikwako tuko rpatn nahti duka nahti dukakfot. <sup>14</sup>“Tunn yak marnyewa kanjo inji womm yak marnyakfot.” Nkifra boririfhuthu mnat tot inji. <sup>15</sup>Be nd foh yaum nahti srthuwa kanjo inji nahti srthu haso-rahko be nhai rpat tohruhatko. Inji rinahtakhato nathu mbranirahko. Bro Nkifrarhu temperr be ndnatn tfit yoh nasohrahr.

<sup>16</sup>Kfo hta mrokfot kfiwanko. Bro Nkifrarhu Yafothat yak htafo hanyuk yuharpat hik hakurahko, be nd fasoh yima yuhum yiho sinyaneft nd Yafothatn yak karhurahtm. <sup>17</sup>Nd fasoh yima yuhuri Bro Nkifrarhu Yafothathu dukefr nhai rpat nayak tkafkahf. Bro Nkifrarhu dukefr ror nndo. Fasoh yima yuhurhu dukefr ror nndo. Ndnetfn mano mano tohwafn tehwofm nikmoh yima yuhum. Dborioh nefm kangko ananom, to nhai nakahkomm. To tfit fasoh nefm niko hti hhrekhwam tfit nd nefmnd newuko. <sup>18</sup>Bro Nkifrarhu Yafotharpat yak hta bohtarahko be htirahko boririfhut nhai tfit yak hta bohtarahatto.

<sup>19</sup>Nd fasoh yima yuhur rhuyuk nefm bi htiyeteko. Fasoh yima yuhur yorhwa nefm to,

Ijoh tonanyeft.

Ijoh tonehato yihof href to be nd dukefrn tohetoh hasokfot.

<sup>20</sup> Nkifra tahi yifonroh kfo tatoneft.

Yima tipneft, grwasneft, fortawon, nd nd yakitohneft.

Womm be hti srthuneft.

Kfo nambur kfo huttnefm.

Womroh hifa hingerneft o wuskam o tamohm hti yuhurhato kfo yuhuwehhato kfo wokneft.

Yima yuhum kaht kanjo wakur sinyaneft.

Nhai mfhat kasinyahato womm tamohm hti dukakfot.

Nayak mkuhato womm rom inji, womm rom inji, ndhtet tohneft.

<sup>21</sup> Womroh hifa hingerneft o wuskam o tamohm hti yuhurhato yakneft.

Drin spak nefm.

Drin spakhato yaum kanjo yihom nakuyak mnakuyakneft.

Ndhtet ndhtet nefm.

Mrokfot to bi kfomoyanko tfit wompam kfiwanko. Ndhtet ndhtet fasoh nefm na haset yimam to mirahko Bro Nkifrarprno ka muhrahm Kraistr yawihna thombat. Tu be nhai mif.

<sup>22</sup> Yimar Bro Nkifrarhu Yafothat ruhetr htirahnr:

Wom yimam hti dukarahm.

Yindhoh rifhurprno rhurahr.

Wommpno hifa hifa nayak marnyahato rhu marnyarahr.

Tamoh mrokfom wanyneft nhai be bmbri kaht kanjo wakuryakhato huttniruhatr.

Hifa hifa yima yuhur womm hmbrearahm.

Wom yimam yak marnya bomar-nyarahm.

Rorhu wiyauyau nmbuhat hifa yau marnyahato kmi thofroh dukefm rorpar bro dukeft htarahm.

<sup>23</sup> Rorhu ruhefm, pthefm, ptha yima boyimarahm.

Fasoh fasoh nefm duka hikhato yak hhrifnirahm.

Tom ndhtet net yimam Bro Nkifrarhu Yafothat korhttm. Nhai wom boririfhut kfo mikaht, “Ndhtet nefm mirahko ananomm.” Nhai.

<sup>24</sup> Kraistrprno bi rim tohet yimam rroh fasoh fasoh yima yuhum bi Kraistr Jisarsru bgre misn bi frdbkafmomm.

<sup>25</sup> Bi Bro Nkifrarhu Yafothatn nfri yima yuhur thu hmbremornom.

Ndnetnomn Bro Nkifrarhu Yafothat finji kfiwutnom be nd Yafothat

kfoyuk yuhatn nom hikkfot. <sup>26</sup> Mirahko akfo hagrhahtnom womm

wanyhato yima yuhum atifranjimm. Mirahko womroh hifa hingerneft o wuskam o tamohm htihato yima yuhum asinyamnom.

### Fitohtet yewurit nuhte, ndhtet yewurit kekwo

**6** <sup>1</sup> Bar yinouroko duka marnyafo hanykfot. Nikmoh womr htita-wokomr wom fasoh neft yifir, niko womko, Bro Nkifrarhu Yafothatn

nikmoh wiyauyau nmbuham yak hta bohtiwako, nikomn yihato hifa yima yuhur nd yimar kfo hta bohta marnya-kfot. To niko, nd yimar mrokfom kfo ptharahnomr, niko tuko duka marnyafo hanyhato womr kfo pthakfot. Satanr nikomn tfit rim suhnhato hatone nhehruhatrko suhrahko. <sup>2</sup>Tuko nahti duka nahti dukakfot. Nikmoh womm tamoh tamoh krhopam kekwo, niko womko yihato titanhokfot. Tot tu Kraistr hiket yimaroh nef. <sup>3</sup>Ni womn mirahn akfo amiya, “Na nd yimar kanjo krhopam yekwoyann na yi htiruhanr?” Ndhтет tngt ka be kfo fura twanhiwun. <sup>4</sup>Yima afo tunhu rhu wiyauyau nmbuham hti tungunahato ee kfo pthakfot. Tu hifa hifa korht ninhu rhu wiyauyau nmbuhat ee btn kfo yindhorneft hifa. To mirahn ninhu rhu wiyauyau nmbuhat hifa htihato tfit womr faso akfoyanr. <sup>5</sup>Ni womn tunhu wiyauyau nmbuhat hti yukatohaf hanykfot. Mirahn womrhu nefm htihato apthaya. Womr, ror turhu duka fijo rhurahr.

<sup>6</sup>Fitoh yimarn Bro Nkifrarhu mrokfekt kak nuhasworko niko tawo maruham o wuskam o yeshrim ndm yakhato hekfot.

<sup>7</sup>Mirahko aduka amanyom, “A, nhai mrokfom. Nom nhai bi wom boririfhut rhukahtnom. Tunmoh fijo wiyauyau thombat Bro Nkifrar nhai htiruhatrnom.” Ka Bro Nkifrarhu kusmt frsfewuko? Na kfiwanko, be tu nhai mif. Tamohтет wuri fanm trufn o nuhte be ndhet wuri fanm sinyarahm. Nhai tfit kekuthato womhtet wuri fanm sinyaruhatm. <sup>8</sup>Yimar turhu fasoh yima yuhur mhatoh fnahmor afo rhu yakitoh hanitr, nd yimar Bro Nkifrar yak hatohaforuhattr kaht riyahr. Nd fasoh yima yuhur yak thuhato Bro Nkifrarhu Yafothathu dukefrn hiketr, be nd yimar tu Bro Nkifrar yak hatohaforuhattr turpno mto nkifranirahr. <sup>9</sup>Ndnettnd dborioh dborioh nefroh nanefn nom nhai hhrekakhato yafho thukfot. Yakitoh kihhato Bro Nkifrar fitoh yiharn dborioh rhu nmbuhat heshombat nhai rim tohtaruhatnom. <sup>10</sup>Ndnettnd nom Jisasr hiket yimanom wom yiham wom Jisasr hikwa yimam htihato kangnom, “Womm dborioh nefm ayak nuhasnomm,” nhai mrokfom. Yo nom wom wom yima bugamn dborioh nefm yak nuhaskfot.

### **Jisas Kraistrhu yufarpat kfo yuta hagrha yindhorkfot**

<sup>11</sup>Ndar na asomif kforuha mrokfot tukanhu tire wandfamoyant. Nanhu wandfetem nd bro wandfafam. Wahtikahkonn duka marnyakfot! <sup>12</sup>Wawanyko, nd nikmoha nia kfo pthiwa yimam yuwi duka kangm, “Tha pukneft akfokahtnomm Galesia thofm tha pukruhamn nom hingrnyayuk hingrneft Judam htiruhamn kfo yindhorrhahmnom.” Nd dukeftpno tha pukneft kak tkrurwomko. Duka kangm, “Kfo mirahnom, ‘Bi bgre misn nikmoh fasoh fasoh nefm Kraistr mfha htamorm.’ Inji kforahnom Judam nhai hifa nyingam htaruhatmnom.” Nd dukeftpno inji kfiwumko. <sup>13</sup>Nd yimam rom tha puketm. To nhai Judaroh boririfhut hik marnyakahmt.

Be yuwi kangm, “Wommn akfokahtnom, tha apukkahmn, Judam wanyruhamn kfo yindhorkmirahm, ‘O hifa hingrneft hingrnewum.’”

<sup>14</sup>Na nhai inji kfo yindhorkfot. Nanhu kfo yindhorneft nanhu fasoh nefmn mfha htahemo yima Jisas Krairhu yufarpatn na kfo yuta hagrha yindhorkfot. Rorn nanhu fasoh nefm mfha htamotrm nhai wom dukakahanm ndar bbinysofthu fasoh nefm. Womrpamn ndar bbinysofthu nefm dukewamn nhai dukakahmt Jisasr mfha htamo nmbuhat.

<sup>15</sup>Arihat Bro Nkifrar nhai tha puket yimam o tha puk duha yimam htihato yindhorkahr. Nhai. Yimam tu Bro Nkifrar yima yuhu yak wus bowuswam, tom ndhtet ruhet yimamn Bro Nkifrar hti yindhorkwor.

<sup>16</sup>Ndhtet ruhet yimam hti yuhuwafruharmn yak marnya bomaryahato Bro Nkifrarhu yon kunys rhurahm.

<sup>17</sup>Na nhai wom wofnkaha yimam tfit wom krhopam hanyeft. Bi yonmari fhu gifa trukt harhuwa. Nd fhu gifa trukt kfiwut na Jisasrhu hingrna yimaya.

<sup>18</sup>Be injirpa nanhu mrokfom. Warhutwako. Bro Nkifrar kukatohaf hanitworko.